

# Dahcej Rox Benz Faex



## 会爬树的姐姐

“Yahbuz, gou daeuj bang mwngz!” Raq singriu he daj baih-laeng cienz gvaqdaej, yienzlaiz dwg dahcej. Yahdaiq ngeiz dwk cam: “Lan ha, mwngz miz maz banhfaex ne?”

“Benz faex!” Gangj sat, couh raen dahcej got dawz gomak, lumj duzlingz nei “fwi” couh benz hwnj gwnz gofaex bae.

Yahdaiq gipmuengz naeuz: “Lan ha, siujsim bw, gaej doek roengzdaej!”

Seizneix, dahcej diem din yaengx fwngz, cingq siengj mbaet makdauz. Aenvih makdauz maj youq rieng nye, dahcej baenzlawz cungj aeu mbouj ndaej, baez he, song baez, sam baez……Mwh dahcej youhcai q siengj bae mbaet makdauz seiz, lajdin cix caij mbouj

dawz nyefaex……Caen yungyiemj! Caenh raen dahcej lingzsingj dwk got dawz gofaex, “bungz” sing he, onjdaekdaek naengh youq gwnz ngafaex.

“Aeyo!” Yahdaiq doeksaet yat, gip dwk hemq: “Vaiqdi roengzdaej, roengzdaej, mbouj aeu lo!”

“Mbouj miz saeh law, yah-buz.” Dahcej yawj coh yahdaiq riugekgek.

Haxbaenh ngaiz hit le, dahcej siengj ok aen banhfaex wng. De caij youq gwnz nyefaex, hawj nyefaex goz le caij hawj yahdaiq bae mbaet aenmak, yienghneix makdauz couh yungzheih mbaet lo.

Dahcej gou rox benz faex, dwg mbouj dwg gig geizheih ha?

(seiq nienzgaep Cau Yinzfeih)



## Bouxaugaujvaq Iq

### 小乞丐

Ngoenz he, caeuq daxmeh ok dou bae youz, byaij dwk byaij dwk, gou sawqmwh yawjraen henz roen miz boux gaujvaq he cingq maeuq youq gokciengz guh gaujvaq. Daegde buh rwix vaq uq, faj naj iq ndaemndwtndwt, song lwgda launyaenq dwk yawj vunz bae vunz dauq.

“Bohmeh de mbouj guenj de, roxnaeuz dwg bohme de cungj gvaqseiq liux ne? De lij miz bouxcaen gizyawz lwi? Baenz nyaeq couh okdaej guh gaujvaq, hojlien lai lo.” Gou gag naemj.

Gou doiq daxmeh naeuz: “Daxmeh, boux gaujvaq iq neix hojlien lai, dou bae hawj de geij maenz ngaenz ba.”

Daxmeh riunyumnyum naeuz: “Baenz, daeglwg gou rox hojlien bouxwng, gijneix dwg saeh ndei.”

Dou byaij daengz henz ndang bouxaugaujvaq iq, daxmeh doiq de naeuz: “Siuj baengzyoux, gou hawj mwngz geij maenz ngaenz ba.” Gangj sat, couh cuengq geij maenz ngaenz daengz ndaw vanjdiet de bae.

Bouxaugaujvaq iq mbouj naeuz docih, cix yungh lwgda iq de gamjgik dwk yawj gou caeuq daxmeh. Dou byaij gyae le, gou lij nyaenx mbouj ndaej ngeux gyauej gvaqdaej yawj, lij raen bouxaugaujvaq iq haenx muengh dou……

Ndaw sim gou naemj: Bouxaugaujvaq iq neix baenzneix hojlien, gou ngoenznaengz miz daxboh gyaez daxmeh maij, vuenyungz lai lo. Hoeng gou lij gingciengz mbouj dingq vah, caen mbouj wnggai lo, baezlaeng gou itdingh dingq gij vah bohme cij baenz.

(sam nienzgaep Huz Yizsenh)

## Duzvaiz Deng Ienuengi

### 水牛被冤枉

Duzvaiz youq ndaw naz gaenxgaenx maenhmaenh dajcae baenz ngoenz, seiz dauqma gaenq baeg ndaej daengx ndang unq liux, de ninz youq ndaw riengh baegfofo.

Duzma buet gvaqdaej yawj. Duzma sim' in naeuz: “Beixnuengx ha, baenz yienghneix sinhoj ha?”

Duzvaiz gyangz hoj naeuz: “Ai, beixnuengx, gou saedcaih daiq baeg lo, ngoenzcog caen siengj yietnaiq ngoenz ndeu.”

Duzma biek deuz lo, youq gak ciengz bungz raen duzmeuz. Duzma naeuz: “Beixnuengx ha, gou haxbaenh bae yawj duzvaiz daeggo, de saedcaih daiq baeg lo, de gangj de siengj yietnaiq ngoenz ndeu. Hix nanzgvaq de ha, bouxcawj hawj de guhhong daiq lai daiq naek lo.”

Duzmeuz cienz ndang okbae, youq rog raen duziengz, doiq duziengz gangj: “Duzvaiz ienq bouxcawj hawj de guhhong daiq lai daiq naek lo, de siengj yietnaiq

ngoenz ndeu lo.”

Duziengz youq ndaw gyang-hongh raen duzgaeq, doiq duzgaeq naeuz: “Duzvaiz mbouj siengj hawj bouxcawj guhhong lo, de ienq hong daiq lai daiq naek. Ai, hix mbouj rox bouxwng doiq vaiz swheij dwg mbouj dwg lai ndei di.”

Duzgaeq doiq duzmou gangj: “Duzvaiz mbouj siengj hawj bouxcawj guhhong lo, de siengj bae ranz wng yawjyawj. Hix caen cojgvaq lai, bouxcawj doiq duzvaiz mbouj in saekdi, hawj de guh baenzlai hong youh naek youh uq, lij yungh bien haenqrengz sak de.”

Bancaeuz, yah bouxcawj daeuj gueng duzmou, duzmou naeuz: “Bouxcawj ha, gou lwnh mwngz nyi, mboengqneix duzvaiz doiq bouxcawj miz eiqgienq bw, mwngz aeu menhmenh son de. De mbouj nyienh caiq bang bouxcawj guhhong lo, de yiemz bouxcawj

hawj de guhhong daiq naek daiq lai daiq baeg daiq uq lo. De lij naeuz aeu biek liz bouxcawj, bae ranz wng ne.”

Seiz gwnz daiz gwncaeuz, yah bouxcawj doiq bouxcawj naeuz: “Duzvaiz siengj fanj mwngz lo, de siengj vuenh bouxcawj. Fanjgoet mbouj ndaej nyiuzcingz, mwngz naemjnaemj baenzlawz ceih de?”

Bouxcawj dingq le, hozndat raixcaix, hemq naeuz: “Doiq boux fanjgoet, gajdai mbouj nyiuzcingz!”

Ngoenz daihngaih, duzvaiz baenzneix gaenx hong, baenzneix lauxsaed, deng bouxcawj gaj dai lo.

Geijlai hojlien ha! Duzvaiz dauqdaej guh gijmaz lo? Cungj dwg vah cienz nyex haih. Daihgya mwngz cienz gou gou cienz mwngz, saehcingz cungj bienq liux lo, geijlai haih vunz ha!

(Ganh Sozvwng / 甘说文)

## Duz Moulwg Gou

### 我的小猪

Gou miz duz “moulwg” he, hoeng de mbouj caencingq dwg duzmou, cix dwg aen guenq romngaenz he.

Youq gizgyae yawj gvaqbae, “moulwg” daengx ndang cungj dwg hoengzmaeq, aj bak dwk riu-nyumnyum, dwggyaez lai lo. Gwnz aemq de miz aen vaug he, ndaej youq gizhaenx oet cienz roengzbae.

Miz duz moulwg neix le, gou ngoenznaengz cungj dawz gij ngaenzlingz mbaet roengzdaej haenx cuengq roengz ndaw dungx de bae, de moix baez cungj lumj gangj hawj gou: “Bouxcawj iq, mwngz youh gueng gou doxgaiq lo, caen ndei.” Ngoenz gvaq ngoenz, duz moulwg gou bienq naekswtswt.

Gou caeuq moulwg doxndiep lai

lo.

Miz baez he, mbaw sigenj gou mbouj raen lo, gou nyapnyuk raixcaix, yawj gijmaz cungj mbouj habhoz. Dauq daengz ndaw ranz, gou couh buet bae ndaw fuengz ra, yawjraen moulwg cuengq youq gwnz daiz haenx, de mbwnj bak dwk, lumjbaenz doiq gou gangj: “Bouxcawj iq gaej nyapnyuk, baezlaeng mbouj baenzneix lujlaj couh ndaej lo.” Gou yawjyawj duz moulwg, riu lo.

Lij miz baez dem, gyoengq baengzyoux ndei gou bouxboux cungj miz gij baengzvaj swheij, couh gag gou mbouj miz. Gou cang hojlien dwk yawj duz moulwg, moulwg lumjbaenz youh doiq gou naeuz: “Baenzneix ndei mbouj ndei, daj gwnz aemq gou dawz ngaenz okdaej, hoeng caenh ndaej cawx baengzvaj, mbouj ndaej luenh cawx gijwnq bw.” Yienghneix gou couh daj gwnz aemq moulwg mbon ngaenz okdaej, angqvauvau bae cawx



baengzvaj lo.

Moulwg seiz mbouj seiz cungj bangcoh gou, danghnaeuz mbouj miz de, gou caen mbouj rox baenzlawz guh. Ndigah gou wnggai docih de. Gou caen maij duz moulwg gou.

(sam nienzgaep Yangz Cingyiz)